

10 MAY 2002

Mahathir-Puteri Umno

KETUA PUTERI UMNO AKAN JADI SEORANG DARIPADA NAIB PRESIDEN

KUALA LUMPUR, 10 Mei (Bernama) -- Ketua Puteri Umno akan menjadi seorang daripada Naib Presiden parti apabila pergerakan itu disahkan sebagai satu daripada entiti parti itu kelak, kata Perdana Menteri Datuk Seri Dr Mahathir Mohamad hari ini.

Dr Mahathir, yang juga Presiden Umno, berkata Majlis Tertinggi (MT) parti itu yang bermesyuarat hari ini bersetuju untuk membuat pindaan perlembagaan parti berhubung Puteri Umno pada satu mesyuarat khas semasa perhimpunan agung Umno pada Jun ini.

"Telah dipersetujui oleh MT tentang pindaan yang akan dibuat, dan termasuk dalam pindaan itu ialah Ketua Puteri akan menjadi seorang daripada Naib Presiden Umno, dan di peringkat bahagian dan cawangan kedudukan mereka juga adalah sama," katanya pada persidangan media selepas mempengerusikan mesyuarat MT di pejabat Umno di Pusat Dagangan Dunia Putra (PWTC) hari ini.

Dr Mahathir berkata Ketua Puteri Umno perlu diberi taraf yang sama seperti yang diperuntukkan kepada Ketua Pemuda dan Ketua Wanita dalam parti sekarang kerana Puteri Umno juga merupakan sayap kepada parti itu.

"Tiada sebab kenapa kita tidak memberi layanan yang sama kepada Puteri (Umno) seperti yang diberi kepada Wanita dan Pemuda, apa juga kedudukan Ketua Pemuda dan Wanita, juga diberi kepada Puteri Umno di semua peringkat," katanya.

Puteri Umno yang ditubuhkan pada 3 Ogos 2000 adalah satu sayap Umno yang rata-rata dianggotai oleh generasi muda berumur 35 tahun ke bawah.

Ditanya sama ada kerjasama antara Umno dan Pas mengenai isu Palestin akan membawa kepada penyatuan yang lebih erat antara kedua-dua parti, Dr Mahathir berkata Umno sentiasa mengalu-alukan kerjasama dengan Pas dalam soal itu tetapi ia tidak bermakna Umno kini mempunyai pendapat yang sama (dengan Pas) dalam semua perkara.

Katanya perbezaan pendapat tetap wujud antara Umno dan Pas dan selagi tiada pendapat yang sama dalam perkara itu, adalah agak sukar untuk kedua-dua parti bersatu-padu.

"Kita boleh berusaha ke arah itu jika mereka juga bersedia melakukannya, barangkali terdapat bidang-bidang yang kita tidak harus bertelagah antara satu sama lain seperti isu penguasaan ilmu dan pendidikan. Tetapi kalau Pas mengatakan ilmu tak penting, itu kita tidak boleh terima," katanya.

Dr Mahathir berkata usaha perpaduan antara orang Melayu memang dialu-alukan tetapi ia mestilah mempunyai asas yang kukuh seperti berkenaan isu kekejaman Israel terhadap penduduk Palestin.

"Dalam soal ini kita tidak ada masalah untuk bekerjasama dengan Pas atau sesiapa sahaja dalam usaha menentang tindakan Israel terhadap Palestin," katanya.

Dr Mahathir berkata Umno sejak awal-awal lagi telah memperjuangkan penyatuan antara orang Melayu berdasarkan usahanya menyatu-padukan sokongan negeri-negeri Melayu untuk menghadapi cabaran Malayan Union, mengalahkan penjajah British dan seterusnya mencapai kemerdekaan untuk negara ini.

"Ini perlu diiktiraf oleh semua pihak," katanya.

Ketika ditanya sama ada Umno akan mengambil inisiatif supaya kedua-dua parti boleh mencapai kata sepakat, Dr Mahathir berkata pihaknya telah berusaha ke arah itu tetapi kurang mendapat respons.

"Kalau ada respons, OK sikit, kita (Umno dan Pas) boleh duduk dan bincang untuk cari satu jalan yang baik," katanya.

Menjawab soalan sama ada siri syarahan Perdana mengenai isu Palestin yang menggabungkan pemimpin kedua-dua parti seperti yang diadakan di sini pada 8 Mei lepas akan dilanjutkan ke negeri-negeri, Dr Mahathir berkata ia tidak perlu.

Sementara itu Timbalan Perdana Menteri Datuk Seri Abdullah Ahmad Badawi yang juga Timbalan Presiden Umno berkata pada mesyuarat yang sama pihak pengurusan Umno telah bersetuju untuk meluluskan 44 cawangan baru Umno di seluruh negara.

Katanya pengurusan parti juga akan mengadakan kempen untuk menambah bilangan anggota Umno khususnya untuk menarik lebih ramai golongan muda dan meramaikan lagi anggota Pergerakan Pemuda, Wanita dan Puteri Umno.

Persediaan akan diadakan untuk acara perasmian Pergerakan Puteri Umno, selepas pindaan mengenai perkara itu selesai dan diluluskan pada perhimpunan khas kelak, katanya.

Abdullah juga berkata satu perhimpunan besar akan diadakan sempena menyambut ulang tahun Umno esok selain majlis tahlil yang akan diadakan malam ini.

-- BERNAMA

WNZ HS AHH NMO